


BILTEN



INFORMATIVNE NOVINE ISLAMSKJE ZAJEDNICE BOŠNJAKA U ŠVEDSKOJ
OKTOBAR 2024. / REBI'U-L-AHIR 1446. H.G.



Sadržaj

- 3 Uvodnik
- 4 Aktivnosti iz Zajednice
- 20 Duhovnost



Poštovana braćo i sestre!

Prije deset godinu našu domovinu zahvatile su velike poplave. Tada je gotovo trećina zemlje bila pod vodom. Ovih dana svjedočimo novoj katastrofi u Bosni i Hercegovini. Ponovo se radi o poplavama. Srećom, ovaj put je stradalo manje područja, međutim, razmjere katastrofe u mjestima koja su pogođena su strašnije nego prije deset godina. Voda je sa sobom odnijela veliki broj kuća i drugih objekata. Posebno teško bilo je gledati potopljenu džamiju u Donjoj Jablanici, a najtragičnije je što je veliki je broj ljudskih žrtava.

I dok se strašni prizori smjenjuju jedan za drugim, prisjećamo se 155. i 156. ajeta sure El-Bakare u kojima stoji:

”A iskušavat ćemo vas, sigurno, nečim – strahom, glađu, gubitkom imetka, života i ljetine. I obraduj strpljive, koji, kad ih zadesi kakva nesreća, kažu:

Mi, doista, Bogu pripadamo, i mi se, sigurno, Njemu vraćamo.”

Prilika je ovo zato da se još jednom zapitamo jesmo li dovoljno svjesni ovih Božijih riječi?

Koliko se spremamo za naša eventualna iskušenja?

Konačno, možda i najvažnije pitanje, koliko smo spremni pomoći onima koji su stradali?

Prije deset godina smo na nivou Islamske zajednice Bošnjaka u Švedskoj za samo nekoliko dana prikupili preko pola miliona švedskih kruna.

Nadamo se da ćemo još jednom pokazati osjećaj solidarnosti i želje da pomognemo.

Stoga, uz iskrene hajr dove Allahu, dž.š., pozivamo vas da se uključite akciju za pomoć stradalim područjima koju je pokrenula Islamska zajednica.

Esselamu alejkum,

IDRIZ-EF. KARAMAN
GLAVNI IMAM



AKTIVNOSTI IZ DŽEMATA I ZAJEDNICE

UČEŠĆE PREDSTAVNICA ŽENSKOG AKTIVIZMA IZBUŠ-A NA SEMINARU U SARAJEVU



U organizaciji Odjela za brak i porodicu Rijasetu Islamske Zajednice u BiH, u periodu od 20-22. septembra 2024. godine, održan je dvodnevni seminar za koordinatorice ženskog aktivizma sapodružja Bosne i Hercegovine i Dijaspore pod nazivom: "Kako pomoći sebi, porodici i zajednici u savremenom dobu".

Seminaru su prisustvovala i dvije članice iz komisije za ženski aktivizam ispred Islamske zajednice Bošnjaka u Švedskoj, Merjema Jašarević i Devleta Džanić. Seminar je održan u Sarajevu u prostorijama Gazi Husrev-begove medrese, gdje je bio i smještaj za sve učesnice. Seminar je okupio preko 120 učesnica, a stručni predavači i teme su bile: "Pozitivan uticaj asertivne komunikacije u životu": prof. Sibela Zvizdić. "Stres, anksioznost depresija i tuga", prof. Amela Dautbegović, "Toksicni pozitivizam/toksicni odnosi", dr. prof. Žigić Nera, "Digitalni mediji i mentalno zdravlje porodice", dr. prof. Dženana Kulugija, a na temu "Balansiranje između sadašnjosti i briga za budućnost" govorila je prof. Hajrija Ibrišagić.

Naša zapažanja su da je seminar bio izuzetno kvalitetan, da su teme bile aktualne, te su nam dali dosta korisnih savjeta i alata za rad i razvoj naše Zajednice, ali i društva općenito. Primjetno je da su seminari sve sadržajnije, sve posrećeniji, i da se u našoj Zajednici sve više i sve ozbiljnije razumjeva važnost žene i ženskog aktivizma. I ovaj put odajemo priznanje organizatorima, na čelu sa dr. Safijom Malkić, šef odjela za brak i porodicu. Ali se i zahvaljujemo IZBUŠ-u na podršci u realizaciji ove aktivnosti kroz aktivnu podršku Glavnog Imama i sekretarijata u svim aktivnostima prije i poslije samog seminara.

Uz dovu Allahu, dž.š., da nam pomogne u našem radu, mahsuz selam.

SEMINAR ZA ŽENE U ORGANIZACIJI ISLAMSKJE ZAJEDNICE BOŠNJAKA U ŠVEDSKOJ



I ove godine su koordinatorice ženskog aktivizma u džematima imale priliku da prisustvuju godišnjem seminaru. Jedenaestom po redu i da svoje znanje povećaju, iskustvo dopune i prijateljstva umnože.

Ove godine se seminar održao u džematu Göteborg, koji je svojim pristorijama, gostoprimstvom uljepšao boravak učesnica. Predavač i savjetnik seminara je bila uvažena prof. Fahira Fejzic Čengić koja je govorila na temu "Komunikacija i vrijeme". Tema kao i predavač su izazvali opće oduševljenje i pohvalu na prelijepim savjetima i datim alatima za rad sa pojedincima u međusobnoj komunikaciji, kao i lakši rad u zajednici. Snaga zajednice, i svrha ženakog aktivizma, podrška se ogleda u tome ,da smo džematu Orebro i džematu Vetlanda pomogli u vakufskom fondu kupovinom džemova koje su vrijedne džematlijeke tih džemata napravile i donijele. Još jedna ljepota postojanja ženskog aktivizma ogleda se u nesebicnoj podrsci listu Sumejja, novini koja sadržajem čuva dostojanstvo, tradiciju, kulturu i jezik Bošnjaka. Ovom prilikom se zahvaljujemo IZ, svim učesnicama, vrijednim predstavnicama domaćinima ovog seminara u Göteborgu, ženskom aktivizmu i predstavnici NBV - Mineli Jakupović.

Merjema Jašarević & Devleta Džanić (Komisija za ženski aktivizam IZBUŠ-a)

PRIČA „DA NISAM“ VASVA ŠILJKOVIĆ

Sjedim u bašti i gledam kako moje pčele izlaze iz košnice i lete u potragu za polenom i nektarom. Jedne lete u lijevu stranu, znam da je tamo plantaža jabuka, skupljaju polen i istovremeno oprašuju voće. Druge lete desno gdje ima maslačka a ubrzo će i uljana repica procvjetati. Vraćaju se sa džepovima, koji se nalaze na njihovim zadnjim nožicama, punim polena žute i narandžaste boje. Kad uđu u košnicu počinju pčelinji ples kojim govore drugim pčelama u kom pravcu i na kojoj udaljenosti se nalazi izvor nektara i polena.

...

Moje misli odlutaše daleko u moj rodni grad odakle sam sa porodicom morala pobjeći davne 1993.godine. Ostali smo bez posla. Moj muž zato što nije htio uzeti pušku i boriti se protiv svog naroda a ja zbog njega.

Kuću smo istom napravili i dvije sobe sredili a za ostalo nismo imali novca. Štedjelo se od plate i sve ulagalo u kuću. Kredit od banke nismo mogli dobiti.

Rat je već odavno počeo u Hrvatskoj. Mislimo neće ovdje u Bosni. Pa mi oduvijek živimo u slozi sa drugim narodima.

Kad sam se vraćala iz prodavnice jedan dan, vidjela sam nekoliko autobusa koji su prolazili kroz naše naselje. Bili su puni ljudi tužnih lica. Saznala sam da su to Muslimani iz Kozarca i obližnjih manjih mjesta. Vozili su ih u logor na Manjaču.

Strah...plavi kombi...strah..ubijanja...strah...
kućni pritvor...strah...glad

Svaku noć smo čekali i mislili: Jesmo li sada mi na redu? Danima nismo imali struje. Nisam mogla da spavam, a iako sam zaspala onda sam imala noćne more.

Pitala sam se često: Zašto već jednom ne dođu i pobiju nas sve. Ne mogu više da izdržim strah.

A onda pomislim na kćerke koje su tada imale 3 odnosno 7 godina. Moramo naći neki izlaz. Moramo bježati odavde, ali gdje i kako.

Čuli smo da Crveni krst organizuje odlazak prema Evropi. To je puno koštalo a mi nismo imali novca. Ako bi ostali u Banjaluci ubili bi nas jer nismo Srbi a ako bi otišli nije sigurno da bi živi prošli ratnu liniju. Na više mjesta postavljene su barikade i bila je kontrola autobuse.

Poneke bi izdvojili i za njih se više nikada ne bi čulo.

Muškarci nisu smjeli izlaziti iz kuće. Vojna policija je pregledala lične karte i ako nisi bio Srbin ili u vojnoj uniformi odvodili su te. Neke su vraćali premlaćene da ih ni majka nije mogla poznati a neke odvodili u logor.

Danima sam išla na pijacu da prodajem stvari iz kuće. Plašila sam se jer nisam imala dozvolu da mogu prodavati. A nisam je mogla dobiti jer sam imala muslimansko ime. Kad bih ugledala vojnu policiju ostavljala bih sve stvari i bježala.

Napokon smo skupili novac za nas četvoro. Tražili su nam razne potvrde: od banke da nemamo nikakvog duga, potvrde da su struja i voda plaćene, od policije da dobrovoljno odlazimo i u koji grad odlazimo.


Slagala sam da idemo u Zagreb.

Upisala sam nas na spisak Crvenog krsta, napokon. Rekli su mi : Za tri nedjelje putujete. Čekali smo u strahu. Jednog dana je izišao moj muž pred kuću da donese nešto i u tom času je prolazila vojna policija. Tražili su mu ličnu kartu. Kad su vidjeli ko je, odvođe ga. Uхватила me panika. Nisam znala šta da radim i koga da molim za pomoć. Torba je bila spakovana za put, ali kud da idem bez muža, sama s djecom. Vratio se kući sutradan pred večer. Dali su mu dva sata vremena da sredi dokumente oko prodaje auta. Rekli su mu: Ako se ne vratiš na vrijeme pobićemo ti sve kod kuće.

Na brzinu sam spremila djecu, na bicikl smo stavili torbu i ja s djecom i biciklom krenula naprijed a muž iza nas. Išli smo sporednim ulicama prema kući prijatelja u strahu da nas nitko ne zaustavi. I nije, na sreću. Tu smo prenoćili i ujutro krenuli prema Crvenom krstu gdje je nekoliko autobusa već stajalo i čekalo na svoje putnike.

Hoćemo li uspjeti doći do Mađarske ili će naš autobus skrenuti na drugu stranu. Gledali smo kuće izrešetane mecima, neke spaljene, a neke porušene.

Čula sam šofera da govori: Sad prolazimo kroz ratnu zonu i ako prođemo bez zaustavljanja, spašeni smo. Mislila sam da će mi srce iskočiti od neizvjesnosti! Molila sam se Bogu. Gledala u svoju djecu i mislila: Jesu li ovo naši poslednji trenuci?



Prolazimo...bez zaustavljanja... Već se smrklo. Iscrpljena od svega zaspim. Nisam dugo spavala. Probudila me neka svjetlost. Pogledala sam vani začuđeno. Muž mi reče: Gledaj! Ovo je Budimpešta. Iz mraka u kojem smo živjeli mjesecima ovo se činilo kao da sanjamo. Probudila sam djecu. Kako smo svi



Da nisam došla u Švedsku ne bih nikada upoznala ovaj divni narod, koji ima veliko srce i koji pruža ruke svima onima kojima je potrebna pomoć, onima koji su pobjegli od svojih kuća jer su bili krivi samo zato što su bili druge vjere ili nacije.

Da nisam došla ovamo ne bih zavoljela ovu divnu zemlju i dobila još jednu domovinu koju volim isto kao Bosnu.

Da nisam došla ovamo ne bih nikada izabrala pčelarstvo kao hobi i bila ovako sretna kao što sam danas.

Vrijeme je da obučem zaštitno odijelo i otvorim košnicu, jednu po jednu. Osjetim miris voska i meda. Fantastičan osjećaj. Podižem ramove i gledam stotine malih, čudesnih stvorenja kako rade. Svaka pčela ima svoj zadatak. Neke čiste a neke hrane larve, neke



AKTIVNOSTI DŽEMATA HALMSTAD

AJDIN-EF. TERZIĆ

U džematu Halmstad održan susret žena, ukazano na značaj aktivizma



07. septembra 2024. godine održan je prvi susret žena nakon godišnjih odmora u džematu Halmstad.

Susretu su prisustvovala članice Komisije za ženski aktivizam džemata Halmstad i džemata Malmo. Ovo je ujedno bila i prilika da se ožive tradicionalne posjete džemata međusobno.

Ovo je druga posjeta džematu Halmstad od žena iz džemata Malmo.

Uvodnu riječ kao domaćin održala je predsjednica Komisije za ženski aktivizam Indira Čutura. Predavanje je održala muallima i predsjednica Komisije za ženski aktivizam Islamske zajednice Bošnjaka u Švedskoj Merjem Jašarević.

Na ovom susretu, uručena je hedija našoj blagajnici džemata Halmstad, aktivistici Bemufa, Manueli Mikić, koja je odlučila da se pokrije. Hediju je ispred Komisije za ženski aktivizam džemata Halmstad uručila predsjednica Indira Čutura.

Muallima Merjem Jašarević se osvrnula na važnost i značaj ženskog aktivizma u džematima, te načinima organizacije i djelovanja. Također je govorila o hijerarhiji u džematima pri Islamskoj zajednici, te pozvala da "majke podstiču našu djecu da prisustvuju na aktivnostima koje organizira naša Islamska zajednica", te da "jedni drugima budemo podrška i vjetar u leđa u organiziranju džematskih aktivnosti".

JEDNODNEVNI EDUKATIVNI IZLET BEMUF HALMSTAD U OSLO (NORVEŠKA)



Jednodnevno edukativno putovanje u Oslo omladinske organizacije Bemuf Halmstad održalo se 28. septembra 2024. godine.

U okviru putovanja omladina Halmstada posjetila je Islamsku Zajednicu Bošnjaka u Norveškoj, te Mrežu mladih Norveške. Mreža Mladih je pripremila prigodan program te zajednički obilazak grada, a imami Ajdin ef. Terzić i Faruk ef. Terzić pripremili su kratki edukativni program u obliku kratkih seminara i predavanja. Govorili su o važnim temama za omladinu, Faruk-ef. govorio je o važnosti i značaju obrazovanja za mlade, a Ajdin-ef. govorio je o kriminalu i omladini, te koliko je važno da se omladina čuva svega onoga što ih povezuje sa prevarama i kriminalom... Većini omladine iz Halmstada je ovo prvi put u Oslu, te im je drago da su imali priliku da obidju grad. Medjutim jos više im znači što su upoznali omladinu iz Norveške i stekli nova poznanstva i prijateljstva. Pored programa, omladina se cijeli dan medjusobno družila, pa su imali priliku da razmijene ideje i iskustva iz svoje organizacije. Omladina Norveške je prelijepo ugostila Bemuf Halmstad i bili su odlični domaćini ovog putovanja.

U ovoj aktivnosti vidi se snaga naše Islamske zajednice, koja ima kapacitete kroz naše vakufe i organizacije kao što su Bemuf i Mreža mladih, te naše imame i džematske odbore, da organizira jednu ovako važnu aktivnost za našu omladinu...

Zahvaljujemo se Islamskoj zajednici Norveške, džematu Oslo na čelu sa Faruk-ef. Terzićem i Mreži mladih na zaista prelijepom druženju.



Na mezarju u Halmstadu otvoren mejtaš (mjesto za dženaze)

U četvrtak, 22. augusta 2024. godine, na mezarju u Halmstadu otvoren je mejtaš. Otvorenju su prisustvovali predstavnici i džematlije džemata Halmstad (IZBUŠ), Gradske džamije i predstavnici Švedske crkve.

Mejtaš je natkriven, tako da će dosta olakšati organiziranju dženaze kada bude kiša i snijeg, budući da su se u prethodnom periodu dženaze obavljale na otvorenom, što je dosta otežavalo, prilikom same dženaze.

Krajem 2023. godine iznijeli smo ovaj problem Švedskoj crkvi, budući da je Švedska crkva glavna za groblja u Halmstad Kommuni. Švedska crkva je prihvatila prijedlog, te za manje od godinu dana napravila mejtaš koji će koristiti muslimanima Halmstada prilikom obavljanja dženaza.

Zahvalni smo Švedskoj crkvi u Halmstadu, i ponosni na saradnju koju imamo.



DŽEMAT HELSINGBORG

"...

*Cijela Mekka te je iščekivala
Dočekaao te cijeli svijet
Zemlja je Rabba molila
i zvijezde i mjesec su te dozivali
Sve je čekalo tvoj dolazak
Hazreti Aminu blagosiljaše jetimi
i izmučeni osjetiše smiraj i spokoj
a siročad osjetiše majčin zagrljaj
Najednom, sve utihnu
i ti dođe - Ja Resulallah
ti siđe - Ja Habiballah
Pored tebe Džibril
a iza njega vojska
nurom obasjanih meleka
i začu se glas:
Muhammed!
Kruna neba,
kruna ummeta,
Muhammed!
Milost svih svjetova i ljudi
sa kraja na kraj svijeta
Hvala Haliku koji te je stvorio
Hvala Rahmanu koji ti je ime
nadjenao
S tobom je Njegov rahmet sišao
Ti si milost Milosnog"*



U mekkanskoj bašči 571. godine rodilo se sunce koje nurom sija i koje svojim sjajem obasjava dunjaluk, Muhammed ﷺ

Poezija je bila jedan od načina na koji su Poslanikovi ﷺ drugovi pokazivali ljubav prema njemu. Stoljećima unazad u Bosni, ali i velikom dijelu islamskog svijeta, taj način pokazivanja ljubavi je pretočen u tradiciju Mevluda, odnosno programa ispunjenog Kur'anom, ilahijama, stihovima, druženjem.

Njegov život je vječna inspiracija, on je sjajan učitelj, vizionar, psiholog, čovjek izuzetne inteligenciju, te Božiji odabranik i poklon svim ljudima.

Uvedimo Poslanika ﷺ u svoje živote učenjem salavata na njega, ali ponajviše stilom njegovog života.

Allahumme Salli Ala Seyyidina Muhammedin ve Ala Ali Seyyidina Muhammed !

SAOPĆENJE ZA JAVNOST U POVODU NAPADA NA NAŠU DŽAMIJU U NORRKÖPINGU



Sa velikim užasom i dubokom tugom, osuđujemo gnusni napad na našu džamiju u izgradnji u Norrköpingu, prilikom čega su polomljeni prozori, a po zidovima ispisane uvredljive poruke. Ovaj vandalistički čin budi bolne uspomene iz vremena kada su mnogi naši članovi došli u Švedsku kao izbjeglice tokom rata u Bosni i Hercegovini. Poruke koje nam se sada upućuju slične su neonacističkim parolama s kojima smo se tada susreli.

Ovaj napad vidimo kao napad, ne samo na naše sveto mjesto i našu zajednicu, već i na temeljne vrijednosti cijelog švedskog društva o poštovanju, toleranciji i različitosti.

Ovo je drugi zločin iz mržnje prema našim džamijama, Zajednici i njenim članovima u kratkom vremenu i to doživljavamo kao opći porast islamofobije u društvu.

Zato apeliramo na Vladi Švedske da učini više na zaštiti vjerskih sloboda u Švedskoj.

U vremenima polarizacije i raspirivanja mržnje, očekujemo da će Vlada djelovati odlučnije i intenzivnije na zaštiti vjerskih zajednica.

Želimo jasno reći da nas ovaj čin mržnje neće pokolebati, niti slomiti naš duh. Naprotiv, to jača našu odlučnost da privedemo kraju izgradnju naše džamiye, koja će biti otvorena za sve stanovnike Norrköpinga.

Želimo, također, izraziti veliku zahvalnost svima koji su nam iskazali podršku i solidarnost u ovom teškom trenutku. Vaše tople riječi i postupci nas podsjećaju da nismo sami u borbi protiv mržnje i netrpeljivosti.

Džematski odbor Džemata Norrköping,
Izvršni odbor Islamske zajednice Bošnjaka u Švedskoj,
Haris Delić, član Međureligijskog vijeća Švedske



BOSNIAKISKA ISLAMISKA SAMFUNDET I SVERIGE
ISLAMSKA ZAJEDNICA BOŠNJAKA U ŠVEDSKOJ

organizuje

POMOĆ

poplavljenim gradovima u BiH

KREŠEVO • KISELJAK • JABLANICA • KONJIC • FOJNICA



PG

73 88 14 - 3

SWISH

123 338 23 48

PORUKA REISUL-ULEME: DUŽNOST NAM JE POKAZATI SOLIDARNOST S PORODICAMA ŽRTAVA I ONIMA KOJI SU IZGUBILI DOMOVE

Prirodna nepogoda koja je zadesila područja nekoliko općina u Bosni i Hercegovini, posebno područja općina Konjica, Jablanice, Fojnice i Kiseljaka, gdje je pored velike materijalne štete, prema dosadašnjim informacijama, stradao jedan broj civila, nanijela je veliku štetu i na infrastrukturi Islamske zajednice u Bosni i Hercegovini.

Neke džamije su potpuno destruirane. Oštećeni su i drugi objekti, kao što su dječja obdaništa i stambeni objekti imama.

Tim povodom reisul-ulema Islamske zajednice Husein-ef. Kavazović uputio je poruku koju prenosimo u cijelosti:

” Naša domovina i građani su pogođeni velikom prirodnom katastrofom koja je napravila ogromnu materijalnu štetu. Veći gubitak od toga je gubitak ljudskih života.


Kao vjernici, prihvatajući Božje određenje, dužni smo iskazati svoju solidarnost i suosjećanje sa porodicama žrtava, kao i onima koji su izgubili svoje domove. Vjerujem u solidarnost našeg naroda koja nikada nije izostala u ovakvim situacijama.

Nadam se da će državni organi i institucije učiniti sve što su dužni da ublaže posljedice ove katastrofe. Islamska zajednica je danas stavila sve svoje resurse na raspolaganje organima Zajednice kako bi pomogli prevazilaženju ovog iskušenja.

Na kraju, u svoje ime i u ime Islamske zajednice u Bosni i Hercegovini, izražavam taziju-saučešće porodicama žrtava, uz molbu Allahu dž. š. da stradalima ukaže Svoju milost, a povrijeđenima da brz oporavak“, kaže se u poruci reisul-uleme.

(MINA)

ODRŽANA SJEDNICA IZVRŠNOG ODBORA IZBUŠ-A



U subotu, 31. avgusta 2024. godine, održana je online sjednica Izvršnog odbora Islamske zajednice Bošnjaka u Švedskoj.

Na sjednici je analiziran protekli period, pri čemu se najviše vremena posvetilo analizi organizacije hadža.

S obzirom na niz grešaka Agencije sa kojom su naše hadžije putovale, Izvršni odbor je donio odluku da će se naredne godine odlazak na hadž organizirati samo preko Rijaseta Islamske zajednice u Bosni i Hercegovini.

U nastavku sjednice Izvršni odbor je donio nekoliko odluka u vezi sa predstojećim aktivnostima. Između ostalog, određeno je da Džemat Göteborg bude domaćin Centralnom mevludu, a da se Savjetovanje za džemate održi 26. oktobra 2024. Ponudu da budu domaćini ovom važnom skupu, Izvršni odbor će poslati svim našim džematima.

Na kraju je Izvršni odbor razmatrao pristiglu poštu i donio nekoliko odluka u vezi s tim.

I.K.

Džemat	Broj članova 12. 8. 2024.
MALMÖ	2388
STOCKHOLM	1838
GÖTEBORG	1538
OREBRO	1252
NORRKÖPING	1188
BORÅS	1080
SKÖVDE	911
LANDSKRONA	859
HELSINGBORG	785
VÄSTERÅS	773
GISLAVED	758
LINKÖPING	736
JÖNKÖPING	659
VÄRNAMO	641
VÄXJÖ	565
TROLLHÄTTAN	520
HALMSTAD	506
TRELLEBORG	452
VETLANDA	255
MOTALA	232
KALMAR	221
VARBERG	206
TROSA	194
SURTE	180
KARLSTAD	130
OSKARSHAMN	74
KARLSKOGA	0
UKUPNO	18.941

**ČLANSTVO U ISLAMSKOJ ZAJEDNICI
ČUVAMO NAŠU VJERU, TRADICIJU I IDENTITET**



BOSNIAKISKA ISLAMISKA SAMFUNDET
ISLAMSKA ZAJEDNICA BOŠNJAKA U ŠVEDSKOJ

UČLANI SE I TI
U NAŠU **ZAJEDNICU**

naša **ZAJEDNICA**

*naše trajno
dobro*




*“Što god vi udijelite, On će to nadoknaditi,
On najbolje opskrbljuje.”*

(Sebe', 39.)

**ČLANSTVOM U ISLAMSKOJ ZAJEDNICI
ČUVAMO NAŠU VJERU, TRADICIJU I IDENTITET**

BIS
Åkerssjövägen 10
461 53 Trollhättan

Telefon: 0763-10 24 47
E-mail: kontakt@izb.se
www.izb.se





Arhitektonika zgrade i cjelokupan ambijent u kojem Fakultet živi zajedno s aktuelnim studijskim programima svjedoče uspostavljeni sklad između tradicionalnih i savremenih islamskih nauka i između istočnih i zapadnih kulturnih vrijednosti.

DUHOVNOST

U SUSRET 12. REBIU-L-EVVELU: PUT DO DŽENNETA JE JEDNOSTAVAN

Abdullah ibn Mes'ud, r.a., pripovijeda od Allahovog Poslanika, s.a.v.s., da je rekao: "Neka mi niko od vas ne govori ništa od mojim ashabima, jer ja želim da iziđem među njih čistih grudi." (Ebu Davud, Tirmizi i Ahmed)

Ovaj hadis ukazuje na to koliko je Poslanik, s.a.v.s., vodio računa o čistoći svoje duše, grudi i svoga srca, kako njegovi osjećaji i odnos prema ashabima ne bi bio opterećen nikakvim vijestima koje bi mogle pokvariti njegovo lijepo mišljenje o njima. Dakle, on želi da oni svi kod njega zauzimaju isto mjesto i da prema svima bude pravedan.

S obzirom da se nalazimo u mjesecu rođenja Poslanika Muhammeda, a.s., svaki dan do 12. rebiu-l-evvela komentirat ćemo jedan hadis u skladu s današnjim vremenom.

Na ovaj način Poslanik, s.a.v.s., želi da očuva ljepotu iskrene ljubavi u ime Allaha. Potpuno je normalno, ako nam neko prenese nešto negativno o drugoj osobi, da ćemo mi na tu osobu gledati drukčije i sa jednom dozom opreznosti i rezervisanosti. Jedan od komentatora ovog hadisa smatra da se iz ovoga razumije i to: da Poslanik, s.a.v.s., želi da napusti ovaj svijet a da bude zadovoljan sa

svojim ashabima i da ni prema kome od njih ne osjeća neku netrpeljivost ili ljutnju.

” Jednom prilikom smo sjedili s Poslanikom, s.a.v.s., pa on reče: - Sad će se pojaviti džennetlija! Tada uđe neki ensarija s čije brade je kapala voda od uzimanja abdesta, a u lijevoj ruci držao je svoju obuću...

Muhammed ibn Keab kaže da je Allahov Poslanik, s.a.v.s., jednom prilikom rekao: „Prvi čovjek koji uđe na ova vrata je džennetlija. Na njih je ušao Abdullah ibn Selam, r.a. Ashabi su ustali i obavijestili ga o tome šta je Poslanik, s.a.v.s., rekao. Rekoše mu: -Obavijesti nas o tvom najboljem djelu koje činiš, čijem se sevapu nadaš! On im reče: -Ja ne radim nešto mnogo od dobrih dijela, ali ono u šta se najviše uzdam je čistoća mojih grudi i ostavljanje onoga što me se ne tiče.“ (Ibn Ebi Dunja u *Es-Samt*) Ovaj vrijedni ashab nas obavještava da Poslanikova garancija njemu Džennet, nije rezultat nekih velikih dijela, nego je to čuvanje svoje, duše, grudi i srca od svega što je ružno i što ne dolikuje vjerniku, kao i to da se kloni svega onoga što ga se ne tiče.

Sličan prethodnom je i ovaj hadis koji prenosi Enes b. Malik, r.a., koji kaže: „Jednom prilikom smo sjedili s Poslanikom, s.a.v.s., pa on reče: - Sad će se pojaviti džennetlija! Tada uđe neki ensarija s čije brade je kapala voda od uzimanja abdesta, a u lijevoj ruci držao je svoju obuću. Sutradan, Poslanik, s.a.v.s., isto reče: -Sad će se pojaviti džennetlija! Opet se pojavi isti čovjek i ovaj je put s njegove brade kapala voda od uzimanja abdesta, a u ruci je držao svoju obuću. Isto se ponovilo i treći dan. Allahov Poslanik, s.a.v.s., je otišao.

Abdullah ibn Amr ibn El-As priđe tom čovjeku i reče mu: -Posvađao sam se s ocem i zakleo sam se da neću noćiti u kući tri noći. Možeš li me primiti tri noći na konak kako ne bih morao prekršiti zakletvu? -Mogu- odgovori ensarija. I zaista, Abdullah ibn Amr je noćio kod toga čovjeka tri noći. Amr prenosi da taj čovjek nije obavljao noćni namaz osim što bi, prevrćući se u postelji, spominjao Allaha i donosio tekbire. Probudio bi se na sabah-namaz, uzeo abdest i učio uobičajene dove. Abdullah je skoro počeo smatrati da su njegova djela uobičajena. I nije se mogao strpiti, već mu je priznao i rekao: -Allahov robe, između mene i mog oca nije se desila svađa zbog koje se ne bih vratio kući. Ali, čuo sam Vjerovjesnika, s.a.v.s., kako tri puta govori da si ti džennetlija, pa sam poželio s tobom noćiti i vidjeti šta to značajno radiš. Međutim, nisam vidio da si uradio i jedno posebno dobro djelo. Hoćeš li me izvijestiti čime si zaslužio Džennet?

Čovjek reče: - Džennet sam zaslužio onim što sam činio pred tobom. Tada Abdullah ibn Amr pođe kući, a čovjek ga pozva i dodade: „OSIM ŠTO U DUŠI NE NOSIM PAKOST NITI NETRPELJIVOST NI PREMA JEDNOM

MUSLIMANU, NITI IM ZAVIDIM NA DOBRU KOJE IM ALLAH DAJE.“ Na to mu je Abdullah samo rekao: "Eto, to je ono čime si zaslužio Džennet, i to je ono što mi nismo u stanju ostvariti." (Ahmed)

To je prava čistoća, duše, srca i grudi i to su odlike i vrline pravih vjernika na koje ukazuje i hadis koji prenosi Ebu Hurejre, r.a., da je Poslanik, s.a.v.s., rekao: „Vjernik je dobronamjerman i plemenit a grješnik je zlonamjerman i pokvaren.“ (Ebu Davud, Tirmizi, Ahmed i Buhari u El-Edebul-mufred)

Abdullah ibn Amr, r.a., kaže da je Allahov Poslanik, s.a.v.s., upitan: - Ko je najbolji od ljudi, pa je odgovorio: „Svako onaj koji je mahmumul-kalbi (čistog srca) i iskrenog jezika. Oni rekoše: -Znamo šta je iskrenog jezika, ali ko je ovaj mahmumul-kalb? On reče: -To je onaj koji je čistog srca, uistinu bogobojazan, ne čini grijehe, niti je nepristojan, niti vara, niti zavidi.“ (Ibn Madže)

Zloba, mržnja i zavidnost su osobine koje čovjeka srozavaju na najniži nivo. Zavidnost uništava dobra djela potpomaže u činjenju onoga što je loše i ružno. Upravo zbog toga nas je Allahov Poslanik, s.a.v.s., upozorio na opasnost zavidnosti, pa je rekao: "Zavidnost uništava dobra djela kao što vatra jede drva a sadaka briše grijehe kao što voda gasi vatru." (Ibn Madže)

Prijaznost, bliskost i ljubaznost su rezultat iskrenog imana i znak lijepog ponašanja. Na to ukazuje hadis u kojem Allahov Poslanik, s.a.v.s., kaže: "VJERNIK JE PRIJAZAN I POŽELJAN U DRUŠTVU, A NEMA HAJRA U ONOME KO NIJE PRIJAZAN, NITI JE U DRUŠTVU POŽELJAN." (Ahmed i)

ZAPADNI MISLIOCI O MUHAMMEDU, A.S.

Majki Hart (Michael Hart), američki pisac

“Moj izbor Muhammeda za vodeću poziciju među najistaknutijim historijskim ličnostima, vjerovatno će neke čitaoce iznenaditi. Međutim, on je jedini čovjeku cjelokupnoj historiji koji je maksimalno uspio na dvjema razinama: onosvjetskoj i ovosvjetskoj.

Bilo je poslanika i vjerovjesnika koji su započinjali s velikim poslanjima, ali su umrli a da poslanja nisu dovršili, kao što je bio slučaj s Mesihom (Isusom) u kršćanstvu. Bilo je i onih s kojima su drugi(poslanici) sudjelovali u istom poslanju ili su im drugi prethodili, kao što je slučaj s Musaom u Židova.

Međutim, Muhammed je jedini koji je upotunio poslanje u vjeri čije odredbe su sasvim jasno određene, u koje su narodi potpuno vjerovali još za njegovog života. Uz vjeru, on je uspostavio i novi oblik države. S tog stanovišta on ima i velike ovosvjetske zasluge. Plemena i narode je ujedinio u jedinstvenu zajednicu i uspostavio njena životna načela, uredio život te zajednice na ovom svijetu dajući joj univerzalan model organizovanja koji se iz njegovog zavičaja širio svijetom. On je taj koji je i započeo i upotunio ovosvjetsko i onosvjetsko poslanje.”

Lav Nikolajevič Tolstoj, ruski književnik

“Muhammedu je dovoljno da bude ponosan to što je jednu primitivnu zajednicu, ogrezlu u krvi, izbavio iz vraških kandži ružnih običaja. Pred njom je otvorio put uspona i napretka. Muhammedov vjerovjesnik će svijet voditi u sporazumijevanje s razumom i mudrošću. Nema nikakve sumnje u to da je Vjerovjesnik Muhammed jedan od najvećih reformatora čovječanstva. Pripada mu najveća slava jer je on čovječanstvo uputio istinskom svjetlu, pravdi i miru, jer je spriječio prolivanje nedužne ljudske krvi i tako otvorio put ka napretku i civilizaciji. Ovo veliko djelo nije mogao izvesti niko drugi do čovjek koji je imao nadnaravnu snagu, čovjek koji je dostojan svakog poštovanja, divljenja i pažnje.”

Bernard Šo, engleski pisac

“Više nego ikad prije, svijet ima potrebu za čovjekom koji bi razmišljao kao što je razmišljao Muhammed, taj vjerovjesnik koji je svoju vjeru uzdigao na razinu dostojnu istinskog poštovanja i uvažavanja. To je najsnažnija vjera u historiji civilizacija, vječna i neprolazna vjera. Ja svoje mnogobrojne sunarodnike zamišljam kako nesumnjivo ulaze u tu vjeru. Ta vjera će svoje prostrano područje naći na ovom kontinentu (Evropi). Proučavao sam ga, tog izvanrednog čovjeka, i po mom mišljenju, Muhammed bi se morao nazvati spasiteljem čovječanstva.”



Mahatma Gandhi, poznati indijski vođa

„Poželio sam upoznati tog čovjeka koji neosporno plijeni srca miliona i miliona ljudi.“

Nedvojbeno sam se uvjerio da sablja nije bila sredstvo

pomoću kojeg je islam stekao svoju poziciju, već je to bila jednostavnost tog Poslanika praćena preciznošću, ispunjavanjem datih obećanja, te njegova potpuna odanost prijateljima, privrženost sljedbenicima, hrabrost i apsolutno pouzdanje u Gospodara tokom izvršavanja svog poslanja.

To su osobine koje su presudno krčile put i otklanjale teškoće, a nikako sablja. Nakon što sam završio čitanje drugog dijela Poslanikovoga životopisa, shvatio sam koliko mi je žao što se djelo tu završava, zbog toga što sam osjetio želju da što više saznam iz Poslanikovoga grandioznog života.“

Alphonse de Lamartine, francuski književnik

„Ako važi pravilo da se ljudski genij mjeri prema krajnjem dometu i zadivljujućim rezultatima, ko se može usuditi da bilo kojeg velikana moderne historije uporedi s vjerovjesnikom Muhammedom, s.a.v.s., i njegovim genijem, uprkos malobrojnim sredstvima kojima je raspolagao? Znameniti ljudi iz moderne historije su izrađivali oružje, uspostavljali zakone, osnivali imperije, a

ubirali su samo prolaznu slavu koja se pred njima raspršivala. Međutim, Muhammed, s.a.v.s., nije samo vodio vojsku, uspostavio zakon, osnovao imperiju, pobjeđivao narode i umirivao vladare, već je predvodio milione ljudi, što je, u dato vrijeme, činilo trećinu svijeta. Uz sve to, on je presudio kipovima i praznovjerju, te pogrešnim vjerovanjima, mislima i uvjerenjima. On nije želio osnovati imperiju ili nešto slično. Ni u njegovom namazu, ni odlasku Gospodaru, odnosno u njegovoj smrti - čak ni u uspjehu nakon smrti - u svemu skupa, nema ni traga varanju i obmanjivanju, već sve jasno ukazuje na čvrsto vjerovanje koje je Vjerovjesniku davalo snagu i moć da učvrsti vjeru koja se dijeli na dva dijela: vjerovanje u Jednost Boga i vjerovanje da kod Uzvišenog Boga nema ništa akcidentalno. Ako se uzme veličina cilja, mala količina sredstava, i grandioznost rezultata, kao tri mjere ljudskog genija, ko bi se onda usudio da sa Muhammedom uporedi jednog velikog čovjeka moderne historije.“

Benjamin Bosworth Smith, poznati američki protestantski biskup

„Muhammed je, u isto vrijeme, bio vojskovođa, političar i vjerski vođa.

Međutim, u njemu nije bilo samoljubivosti svojstvene vjerskim vođama niti vojnih odreda kao u vladara. Nije imao mobiliziranu vojsku, ni tjelesnu gardu, ni utvrđen dvorac, niti posebna primanja. Ako se za nekoga može reći da je prosuđivao s nadnaravnom sposobnošću, onda je to bio Muhammed, po tome što je uspijevao držati uzde vlasti iako nije raspolagao njenim instrumentarijem niti je imao pomoć vladajućeg aparata.“


ZAPOSTAVLJENI SUNNETI: POMAGANJE SUPRUZI

U cilju što boljeg i ispravnijeg slijeđenja našeg uzora Muhammeda, s.a.v.s., u svakodnevnom životu, ovom prilikom želim skrenuti pažnju na jedan itekako zapostavljeni sunnet, a to je da budemo na usluzi i pomoći našim članovima porodice, prvenstveno našoj supruzi.

Dragocjene hadise koji oslikavaju Poslanikov, s.a.v.s., porodični život i kućni ambijent, uglavnom prenose njegove supruge, naše majke, r.a. Od tih hadisa je i ovaj u kojem Esved ibn Jezid pita Aišu, r.a.: „Šta je Poslanik, s.a.v.s., radio dok je bio u svojoj kući? Ona je odgovorila: - Pomagao bi svojoj supruzi (porodici) a kada bi nastupilo vrijeme namaza, izišao bi na namaz.“ (Buharija u El-Edebul-mufredu)

Dobro je poznato je da je Allahov Poslanik, s.a.v.s., preporučio lijep odnos prema ženama i to je bilo među njegovim oporukama na Oprosnom hadžu. Tražio je od muževa da budu pažljivi prema svojim suprugama i da s njima postupaju na najljepši način. To je pokazao i ličnim primjerom, kada je rekao: „Najbolji od vas su oni koji najljepše postupaju prema svojim ženama, a ja uistinu najljepše postupam prema svojim ženama.“ (sahih)

Pogrešno bi bilo razumijevati da nam je naš Poslanik, s.a.v.s., samo uzor u načinu obavljanja raznih vidova ibadeta, uvjetima i načinu kako bi to bilo ispravno obavljeno i ako Bog da, kod Allaha primljeno djelo. Ne smijemo zaboraviti da vjera kojoj nas podučava naš Poslanik, s.a.v.s., obuhvata sve segmente našeg života i dotiče se cjelokupnog sistema našeg ovodunjalučkog života. Najvažnije je naše ispravno vjerovanje, izvršavanje Allahovih, dž.š. naredbi, slijeđenje sunneta - prakse Poslanika, s.a.v.s., čuvanje od zabrana - harama i lijepo ophođenje prema drugima. Općepoznato pravilo je, da Poslanik, s.a.v.s., nije ostavio nikakvo dobro djelo a da nas na njega nije uputio, niti je ostavio kakvo loše djelo i postupak a da nas na njegovu štetnost i loše posljedice nije upozorio.



U našoj vjeri ima itekako mnogo „sitnih“ postupaka, kojima možemo zadobiti veliku nagradu i steći Allahovo zadovoljstvo, a mi ih počesto nismo ni svjesni, niti ih primjenjujemo u svom životu. Od lijepih djela i postupaka za koje će vjernik biti nagrađen je obradovati nekoga i unijeti u njegov život radost i raspoloženje, bilo da se radi o nemoćnom, potrebnom ili bilo kojoj drugoj kategoriji ljudi. Na prvom mjestu su članovi naše porodice, roditelji, djeca, rodbina, a posebno naš životni saputnik, tj. supruga, koja je itekako zaslužna za ljepotu našeg porodičnog ambijenta i neprocjenjiva vrijednost, kojom nas je Allah počastio.

Naš Poslanik, s.a.v.s., je naš najljepši uzor i treba da bude uzor cijelom svom ummetu, jer on je bio najbolji od svih ljudi, najmilostiviji, najblaži u ophođenju prema svim ljudima a posebno prema članovima svoje porodice. U ovom hadisu Aiša, r.a., nas obavještava šta je Poslanik, s.a.v.s., radio kada je boravio u svojoj kući. Pomagao im je u njihovim svakodnevnim poslovima. Jedan od najboljih vidova pomoći našim majkama, suprugama ili sestrama jeste da sami sebe služimo i da ne očekujemo pomoć u onim poslovima koje sami možemo uraditi. To je ustvari i najbolji vid zahvalnosti Allahu, dž.š., na blagodati zdravlja, da sami sebe možemo poslužiti, da se možemo bez ičije pomoći kretati. Bilo bi nekorektno očekivati da nam neko nešto dodaje ili pomaže, a u mogućnosti smo, elhamdulillah, da to možemo sami uraditi.

Aiša, r.a., također prenosi: „Poslanik, s.a.v.s., je sam sebi krpio odjeću, popravljao obuću i radio u svojoj kući isto ono što i ostali muškarci rade kod svojih kuća.“ (Ibn Hibban)

U predaji kod imama Ahmeda u njegovom Musnedu se kaže: „Poslanik, s.a.v.s., je bio čovjek poput ostalih ljudi, krpio je svoju odjeću, muzao svoju ovcu i sam sebe bi posluživao.“

// www.preporod.com

FACEBOOK



IZBUS

WWW.IZB.SE



Media centar
Islamske zajednice u BiH

Radio



Novina

Preporod
ISLAMSKA
INFORMATIVNE
NOVINE

Agencija



Portal



Produkcija





islam.ba

BILTEN

Informativne novine
Islamske zajednice Bošnjaka u
Švedskoj

GLAVNI UREDNIK

Idriz-ef. Karaman,
glavni imam

IZVRŠNI UREDNIK

Nezir-ef. Špiodić

E-MAIL:

bilten@izb.se

WEB:

www.izb.se

IZDAVAČ:

Islamska zajednica Bošnjaka u
Švedskoj

SEKRETARIJAT

Mail: kontakt@izb.se

Tel: 0520-49 90 64

Mob: 0763-10 24 47

Adresa: BIS, Åkerssjövägen 10,
461 53 Trollhättan

BOSNIAKISKA ISLAMISKA SAMFUNDET
ISLAMSKA ZAJEDNICA BOŠNJAKA U ŠVEDSKOJ



محکم

صَلَّى اللّٰهُ عَلَيْهِ
وَسَلَّمَ

إِنَّ اللَّهَ وَمَلَائِكَتَهُ يُصَلُّونَ عَلَى النَّبِيِّ يَا أَيُّهَا
الَّذِينَ آمَنُوا صَلُّوا عَلَيْهِ وَسَلِّمُوا تَسْلِيمًا